

Mond vnd die Sterne gesehen werden, als wenn der 34. Psalm spricht: „Der Himel ist durchs Wort des Herrn gemacht Vnd all sein Heer durch den Geist seines Mundes.“²² Zum dritten heisst der Himel auch die Himlische wonung Gottes vnd seiner auserwelten Engel vnd Menschen, welche ist vber alle sichtbare Himel. Denn wiewol Gott als ein vnendlich wesen alles erfüllet vnd mit keinem ort vmbfangen noch vmbgeschrieben werden kan, wie im Jeremia 23 geschrieben stehet: „Bin ichs nicht, der Himel vnd Erden erfüllet?“²³ Vnd 2. [B 2r:] Chron. 6: „Sihe der Himel vnd aller Himel Himel kan dich nicht versorgen oder vmbfangen“,²⁴ jedoch wird die Himlische wonung, so ausserhalb dieser sichtbaren Welt ist, Gottes Thron genennet vnd die wonung der Auserwelten, dieweil Gott daselbst seine Maiestet in vnaussprechlichem Glantz vnd Klarheit die Auserwelten schawen lest vnd sich jnen zu erkennen gibt one mittel, so er in diesem Leben gebrauchet, vnd one allen gebrechen vnd dürfftigkeit, vnd sie erfüllet mit ewigem Leben, Gerechtigkeit,^c Freude, Seligkeit vnd Herrlichkeit, die kein Auge gesehen, kein Ohr gehöret vnd die in keines Menschen hertz nie komen ist. Von diesem Himel redet der Artickel des Glaubens, das Christus gen Himel gefaren sey, welches zu den Ephesern S. Paulus auch also redet, das er hinauff gefaren sey vber alle Himel,²⁵ vnd zu den Hebreern, das er durch die Himel gefaren sey vnd das er vber die Himel erhöhet sey,²⁶ da er von den sichtbaren Himeln redet vber vnd ausser welchen die Himlische wonung Gottes vnd aller Auserwelten sind.

Haben auch die alten Lehrer auff diese weise
von dem Himel geschrieben?

25 Damascenus lib. 2. cap. 6. schreibt nach der meinung der alten Lehrer hieruon also: „Der Himel der Himeln ist der erste Himel. Der ist vber dem Firmament. Dis Firmament hat Gott [B 2v:] auch den Himel genennet. Sihe das sind zwen Himel. Die Schrift pflegt auch die lufft den Himel zu nennen, als wenn sie sagt: ‚Lobet jn alle geflügel des Himels‘, das ist des luffts. Denn die Vogel nicht im Himel, sondern in der lufft fliegen. Da sihestu, das dreierley Himel sind. Daruon auch der Apostel spricht, das er sey entzückt bis in den dritten Himel“,²⁷ 2. Corinth. 12,²⁸ welchen S. Paulus nennet das Paradis,

^c Gerechtigkeit vnd: B, C.

²² Ps 33,6.

²³ Jer 23,24.

²⁴ II Chr 6,18.

²⁵ Vgl. Eph 4,10.

²⁶ Vgl. Hebr 1,14 und 8,1f.

²⁷ Johannes Damascenus, *Expositio fidei* II, 6 (20), in: PG 94,884 (PTS 12,52,61–53,66). Vgl. Ps 104,12.

²⁸ II Kor 12,2.